

МЕСЯЦА СЕПТЕМВРИА В 14-Й ДЕНЬ.

ВСЕМИРНОЕ ВОЗДВИЖЕНИЕ ЧЕСТНАГО И ЖИВОТВОРЯЩАГО КРЕСТА ГОСПОДНЯ

**И успение во святых отца нашего Иоанна, архиепископа Константина града,
Златоустаго**

Ведомо же буди, яко Златоустаго возследование в сей пресветлый день, в Константине граде, и повсюду не поется Воздвижения ради Честнаго Креста, Господьскаго праздника, и преложиися в 13 день ноемвриа месяца

НА МАЛЕЙ ВЕЧЕРНИ

На Господи воззвах , стихиры на 4, глас 1

Подобен: Небесных чинов:

Крест возносится, * и демони прогоняются, * разбойник Едема убо врата отверзает, * смерть умерщвляется, * и ныне пуста явися, * Христос величается. * Тем веселитесь вси земнороднии, * клятва разрушися. **[Дважды.]**

Приидите боголюбивии вси, * Крест честный возносимый видяще, * возвеличим купно, * и славу дадим, Единому Избавителю и Богу зывающе: * Распныйся на Древе Крестнем, * не презри молящихся нас.

Горесть древле ослаждая Моисей, * избави Израиля, * образом Крест прописуя: * мы же сего вси божественно вернии, * таинственно воображающе в сердцах наших * всегда, спасаемся державою его.

Слава, и ныне, глас 6. Самогласен

Днесь сад животный, * от земных незаходимых недр происходит: * на нем пригвожденнаго Христа известует Воскресение, * и воздвигаемый руками священническими, * Того на небеса возвещает возношение: * Имже наше смешение, * от еже на землю падения, * на небесех жительствует. * Темже благодарственне возопиим: * Господи, Вознесыйся на нем, * и тем совознес нас, * небесныя Твоя радости сподоби, яко Человеколюбец.

Прокимен дне, и Сподоби Господи:

На стиховне стихиры, глас 2

Подобен: Доме Евфрафов:

Водою Боготворною и кровию Твоею Слове, светло Церковь украшается, яко невеста, Креста славу поющи.

Стих: Вознесите Господа Бога нашего, и поклоняйтесь подножию ногу Его, яко свято есть.

Копие со Крестом, гвозди и иная, имиже живоносное Христово пригвоздися тело, возносяще поклонимся.

Стих: Бог же Царь наш прежде века, содела спасение посреде земли.

Егда Амалика Моисей побеждаше, на высоту руже имея крестоявленно, образоваше Христову страсть пречистую.

Слава, и ныне, глас 6:

Днесь Древо явися, днесь род еврейский погибе, днесь верными цари вера является, и Адам древа ради испаде, и паки Древом демони вострепеташа: всесильне Господи, слава Тебе.

Тропарь, глас 1:

Спаси Господи люди Твоя, * и благослови достояние Твое, * победы православным христианом * на сопротивных даруя, * и Твое сохраняя * Крестом Твоим жительство.

По отпущении же Малыя вечерни входит еkkлисиарх со иереем и диаконом, и пареекклисиархом в жертвенник со свещами, и облачится иерей, и диакон, и кадид честный Крест, глаголет:

Благослови владыко.

Иерей: Благословен Бог наш:

Таже, Трисвятое, и по Отче наш, тропарь Креста: Спаси Господи люди Твоя:

Слава, и ныне, кондак.

И взымает иерей честный Крест с блюдом на главу, и вносит его во святыи олтарь: предыдущим же пред ним со двема лампадама, и полагает честный Крест на святой трапезе, на евангельском месте: и вжигают пред ним свещу на всю ночь, а Евангелие поставляется на Горнее место.

Подобает ведати, яко аще случится праздник сей в неделю, ничтоже поется воскресно, ни стихиры воскресны, ниже непорочны, ни степенна гласа: ни Евангелие воскресно читается, точно,

Воскресение Христово: глаголем, не поется же и Свят Господь Бог: но поем всю службу праздника.

НА ВЕЛИЦЕЙ ВЕЧЕРНИ.

Аще в субботу вечера, поем Блажен муж: кафисму всю.

Аще же в неделю вечера, поем Блажен муж, первый антифон.

Аще ли во иной день, Блажен муж: не поем, но по предначинательном псалме поем:

На Господи, воззвах, глас 6.

И поем стихиры, глас 6.

Подобен: Все отложше:

Крест воздвигаемъ, на нем Вознесеннаго страсть пречистую, пети повелевает твари всей. На том бо убив нас убившаго, умерщвленныя оживил есть, и удобри, и на Небесех жити сподоби яко Милосерд, премножеством благодати. Тем радующеся, вознесем Имя Его, и Того возвеличим крайнее низхождение. [Трижды]

Моисей предобрази Тя, руки простер на высоту, и побеждаше Амалика мучителя, Кресте Честный, верных похвало, страдальцев утверждение, апостолов удобрение, праведных поборниче, всех преподобных спасителю. Тем ты воздвизаема зрящи тварь, веселится, и торжествует славящи Христа, Тобою разстоящая собравшаго, крайнюю благодатию. [Трижды]

Кресте Пречестный, егоже обстоят чини ангельстии веселящися, днесь воздвигаемъ, Божественным мановением возносиши вся, окраденем снеди отгнанныя, и в смерть поползшиися. Темже ты сердца и устнами вернии лобызающе, священне почерпаем, возносите, вопиюще, Христа Преплагаго Бога, и Того поклоняйтесь Божественному подножию. [Дважды]

Слава, и ныне, глас 2:

Приидите вси языцы, благословенному Древу поклонимся, имже бысть вечная правда. Праотца бо Адама прельстивый древом, крестом прельщается: и падает низвержен падением странным, мучительством одержавый царское здание: кровию Божиею яд змиев отмывается, и клятва разрушися осуждения праведнаго, неправедным судом праведнику осуждену бывшу: древом бо подобаше древо исцелити, и страстию Безстрастнаго яже на древе разрешити страсти осужденнаго. Но слава Христе Царю, еже о нас Твоему мудрому смотрению, имже спасл еси всех, яко Благ и Человеколюбец.

Вход: Прокимен дне.

Аще случится праздник сей в субботу. В пяток вечера прокимен дне оставляется, и поется прокимен великий, глас 7:

Бог наш на небеси и на земли, вся елика восхоте, сотвори.

Понеже в субботу вечера поется прокимен:

Господь воцарися: И чтения три.

Исхода чтение. [Главы 15 и 16.]

Поят Моисей сыны Израилевы от моря Чермнаго, и веде тыя в пустыню Сур: и идяху три дни в пустыни, и не обретаху воды, да быша пили. Приидоша же в Мерру, и не можаху пити воды из Мерры, горька бо бе: сего ради наречесе имя месту тому, Горечь. И роптаху людие на Моисея, глаголюще: что пием? Возопи же Моисей ко Господу, и показа ему Господь древо: и вложе тое в воду, и сладка бысть вода. Тамо положи ему Бог оправдания и суды. И тамо искушаше его, и рече: Аще слухом

услышиши глас Господа Бога твоего, и угодная пред Ним сотвориши, и внушиши заповеди Его, и сохраниши вся оправдания Его, всяку болезнь, юже наведох Египтяном, не наведу на тя: Аз бо есмь Господь исцеляяй тя. И приидоша во Елим, и бяху тамо дванадесять источников вод, и семьдесят стеблей финиковых: и ополчишася тамо при водах. И воздвигошася от Елима, и прииде весь сонм сынов Израилевых в пустыню Син, яже есть между Елимом и между Синою.

Притчей чтение. [Глава 3.]

Сыне, не пренебрегай наказания Господня, ниже ослабевай от Него обличаемый. Егоже бо любит Господь, наказует: бьет же всякаго сына, егоже приемлет. Блажен человек, иже обрете премудрость, и смертен, иже уведе разум. Лучше бо спю куповати, нежели злата и сребра сокровища. Честнейшая же есть камней многоценных, не сопротивляется ей ничтоже лукавое, благоразумна есть всем любящим ю: всякое же честное недостойно ея есть. Долгота бо жития, и лета жизни в деснице ея. В шуйце же ея богатство и слава: из уст ея исходит правда, закон же и милость на языке носит. Путие ея, путие добры, и вся стези ея с миром. древо живота есть всем держащимся ея, и восклоняющимся на ню, яко на Господа, тверда.

Пророчества Исаиина чтение. [Глава 60.]

Сия глаголет Господь: отверзутся врата твоя Иерусалиме выну день и ноць, и не затворятся, еже ввести к тебе силу языков, и цари их ведомыя. Языцы бо и царие, иже тебе не поработают, погибнут: и языцы запустением запустеют. И слава Ливанова к тебе приидет в кипарисе, и певке, и кедре вкупе, прославити место святое Мое, и место ног Моих прослаблю. И пойдут к тебе боящиеся сынове смиривших тя, и прогневавших тя, и поклонятся следом ног твоих вси прогневавшии тя, и наречешися град Господень, Сион Святаго Израилева. За еже быти тебе оставлену, и возненавидену, и не бе помогай тебе: и положу тя в радость вечную, веселие родом родов. И иссеши млеко языков, и богатство царей снеси, и разумеши, яко Аз Господь спасаюй тя, и избавляяй тя Бог Израилев.

На литии стихиры самогласны, глас 1.

[Андреа Иерусалимскаго:]

Днесь яко воистинну святовецанный глагол Давидов конец прият: се бо яве пречистых ног Твоих покланяемся подножию, и на сень крилу Твоею надеющися, Всещедрый, вопием Ти: да знаменуется на нас свет лица Твоего. Православных людей Твоих рог вознеси честнаго Креста Твоего воздвижением, Христе Многомилостиве.

Насажденное в Краниеве месте, Древо сущаго живота, на немже содела спасение Превечный Царь посреде земли, возносимо днесь, освящает мира концы, и обновляется воскресения дом: радуются ангели на небеси, и веселятся человецы на земли, Давидски вопиюще, и глаголюще: вознесите Господа Бога нашего, и поклоняйтесь подножию ногу Его, яко свято есть: подай миру велию милость.

Прообразуя Крест Твой Христе, патриарх Иаков, внуком благословение даруя, на главах пременены руки сотвори. Егоже Спасе, мы днесь возносяще взываем: даруй христолюбивым людям победы, яко Константину одоление.

Глас 2.

[Феофаново:] Божественное сокровище в земли скрывается, Жизнодавца Крест на небесах показав царю благочестивому: и победы на враги подписание являет разумно. Егоже радуясь верою и любовию, божественно востек к высоте зренья, тщанием же того от земных недр изнесе во избавление мира и спасение душ наших.

[Киприаново:] Рук пременение патриарха Иакова на благословение чад, державное Креста Твоего предъявляше знамение. Егоже мы держаще тверда хранителя, демонския всемошно отгоним полки, и велиарову гордыню в нем низлагаем, враждебнейшаго Амалика побеждаем всегубительную силу. Того и ныне возносима благочестивомудренно, вернии, во очищение грехов, Твоей благости во многомножайшем гласе, вопиюще приносим: Господи помилуй, из Девы воплотивыйся, ущедрити рук Твоих, Блаже, мудрое создание.

[Льва Деспота:] Ты мой покров державен еси, тричастный Кресте Христов: освяти мя силою твоею, да верою и любовию покланяюся и славлю тя.

Глас 4: Восплещем днесь песненное торжество, и светлым лицом, и языком ясно возопиим: нас ради, Христе, суд приемый, и оплевания и раны, и червленицею одевающийся, и на Крест возшед, Егоже видевшие солнце и луна свет скрывают, и страхом земля колебашеся, и завеса церковная раздрася на двое: Ты и ныне даруй Крест Твой честный нам, блюстителя и хранителя, и прогонителя демонов, яко да вси облобызающе, вопием ему: спаси ны, Кресте, силою твоею, освяти ны светлостию твоею, честный Кресте, и укрепи ны воздвижением твоим, яко свет нам дарован еси, и спасение душ наших.

[Анатолия:] Светосиянен звездами образ предпоказа, Кресте, победу одоления благочестивому царю великому, егоже мати Елена, изобретши, мироявленна сотвори: и ты днесь воздвижуще, верных лица зовем: просвети ны светлостию твоею, Кресте живоносный. Освяти ны крепостию твоею, всечестный Кресте, и утверди ны воздвижением твоим, воздвигаемый ко ополчению врагов.

Слава, и ныне, глас тойже:

[Анатолия:] Честнаго Креста Христе, действо прообразив Моисей, победи противнаго Амалика в пустыни Синайстей: егда бо простираше руке, Креста образ творя, укрепляхуся людие: ныне же вещей сбытие в нас исполнися. Днесь Крест воздвизается, и демони бегают. Днесь тварь вся от тли свободися: вся бо Креста ради возсияша нам дарования. Темже радующеся вси припадаем Тебе глаголюще: яко возвеличишася дела твоя, Господи, слава Тебе.

На стиховне, глас 5.

Радуйся, Живоносный Кресте, благочестия непобедимая победа, дверь райская, верных утверждение, Церкви ограждение, имже тля разорися и упразднися и попрося смертная держава, и вознесохомся от земли к небесным, оружие непобедимое, бесов сопротивоборче, слава мучеников, преподобных яко воистинну удобрение, пристанище спасения, даруяй миру велию милость.

Стих: Возносите Господа Бога нашего, и покланяйтесь подножию ногу Его, яко свято есть.

Радуйся, Господень Кресте, имже разрешися от клятвы человечество, сущия радости знамение, прогоняяй враги во твоём воздвижении, всечестне. Нам

помощниче, крепость праведных, священников благолепие, воображаемый, и лютых избавляй, жезл силы, имже пасемся, оружие мира, егоже со страхом обстоят ангели, Христа Божественная слава, подающаго миру велию милость.

Стих: Бог же Царь наш прежде века содела спасение посреде земли.

Радуйся, слепых наставниче, немощных врачу, воскресение всех умерших, воздвигнувый ны во тлю падшия, Кресте честный, имже разрушися клятва, и процвете нетление, и земнии обожихомся, и диавол всеконечно низвержеся. Днесь воздвизаема тя видяще руками архиерейскими, возносим Вознесеннаго посреде тебе, и тебе покланяемся, почерпающе богато велию милость.

Слава, и ныне, глас 8. Иоанна Монаха:

Егоже древле Моисей прообразовал собою, Амалика низложив победи: и Давид песнопевец, подножию твоему, вопия, кланяться повелеваше, честному Кресту Твоему, Христе Боже, днесь грешнии кланяемся, устнами недостойными, Тя изволившаго пригвоздиться на нем, воспевающе, молимся: Господи, с разбойником Царствия Твоего сподоби нас.

Таже, Ныне отпускаеши:

На благословении хлебов тропарь, глас 1:

Спаси, Господи, люди Твоя, * и благослови достояние Твое, * победы на сопротивныя даруя, * и Твое сохраняя Крестом Твоим жительство. **[Трижды]**

НА УТРЕНИ,

На Бог Господь, Тропарь глас 1:

Спаси, Господи, люди Твоя, * и благослови достояние Твое, * победы на сопротивных даруя, * и Твое сохраняя Крестом Твоим жительство. [Трижды]

По 1-м стихословии седален, глас 6:

Токмо водрузися древо Христе, Креста Твоего, основания поколебашася смерти Господи, егоже бо пожре желанием ад, отпусти трепетом, явил еси нам спасение Твое, Святыи: и славословим Тя, Сыне Божий, помилуй нас.

Слава, и ныне, глас 1.

Подобен: Камени запечатану:

Креста Твоего Древу покланяемся Человеколюбче, яко на нем пригвоздился еси Животе всех. Рай отверзл еси Спасе, верою пришедшему Ти разбойнику, и сладости сподобися исповедаяся Тебе: помяни мя Господи, прими якоже онаго и нас зовущих: согрешихом вси, благоутробием Твоим не презри нас.

По 2-м стихословии седален, глас 6:

Днесь пророческое исполнися слово: се бо покланяемся на место, идеже стояша ноги Твоя Господи. И древо спасения приемше, греховных страстей свободу получихом, молитвами Богородицы Едине Человеколюбче.

Слава, и ныне, глас 8.

Подобен: Повеленное тайно:

Проображаше таинственно древле Иисус Навис Креста образ, егда руце простре крестовидно, Спасе мой, и ста солнце, дондеже враги низложи противостоящия Тебе Богу. Ныне бо зайде на Кресте Тя зря, и державу смертную разрушив, весь мир совоздвигл еси.

По полиелеи седален, глас 8.

Подобен: Повеленное тайно:

В рай мя прежде древо обнажи, о вкушении враг принося умерщвление, Креста же древо живота одеяние человеком нося, водрузися на земли, и мир весь исполнися всякия радости. Егоже зряще возвышаема, Богу верою людие согласно возопиим: исполнь славы дом Твой.

Слава, и ныне, тойже.

Степенна, глас 4. Антифон 1-й, ихже стихи повторяюще поем:

От юности моя * мнози борют мя страсти, * но Сам мя заступи, * и спаси Спасе мой.

Ненавидящии Сиона, * посрамитеся от Господа, * яко трава бо огнем * будете изсохше.

Слава: Святым Духом * всяка душа живится, * и чистотою возвышается, * светлеется Троицеским Единством священнотайне.

И ныне, тойже.

Прокимен, глас 4:

Прокимен: Видеша вси концы земли спасение Бога нашего.

Стих: Воспойте Господеву песнь нову, яко дивна сотвори Господь.

Всякое дыхание:

Евангелие от Иоанна, зачало 42, от полу.

Рече Господь: Отче, прослави имя Твое. Прииде же глас с небесе: и прославих, и паки прославлю. Народ же стояй и слышав, глаголаху: гром бысть. Инии глаголаху: Ангел глагола Ему. Отвеща Иисус и рече: не Мене ради глас сей бысть, но народа ради. Ныне суд есть миру сему, ныне князь мира сего изгнан будет вон. И аще аз вознесен буду от земли, вся привлеку к Себе. Сие же глаголаше, назнаменуя, коею смертию хотяше умерети. Отвеща Ему народ: мы слышахом от закона, яко Христос пребывает во веки, како Ты глаголеши, вознестися подобает Сыну Человеческому? Кто есть Сей Сын Человеческий? Рече же им Иисус: еще мало время свет в вас есть. Ходите, дондеже свет имате, да тма вас не имет, и ходяй во тме не весть, камо идет. Дондеже свет имате, веруйте во свет, да сынове света будете.

Таже: Воскресение Христово:

По 50-м псалме

Слава: Молитвами апостолов, * Милостиве, очисти * множества согрешений наших.

И ныне: Молитвами Богородицы, * Милостиве, очисти * множества согрешений наших.

Таже, глас 6: Помилуй мя Боже * по велицей милости Твоей, * и по множеству щедрот Твоих * очисти беззаконие мое.

И стихира, глас 6:

Кресте Христов, христиан упование, заблуждших наставниче, обуреваемых пристанище, в бранех победа, вселенных утверждение, недужных врачу, мертвых воскресение, помилуй нас.

Канон Креста, егоже краегранесие: Кресту надевша пение отрыгаю.

Творение Кир Космы. Ирмосы по дважды: тропари же на 12, глас 8.

Песнь 1.

Ирмос: Крест начертав Моисей, впрямо жезлом Чермное пресече, * Израилю пешеходящу, * тоже обратно фараоновым колесницам ударив совокупи, * вопреки написа непобедимое оружие. * Тем Христу поим Богу нашему, * яко прославися.

Образ древле Моисей пречистыя страсти в себе самом прообрази, священных среде стоя: Крест же вообразив, простертыми победу дланьми воздвиже, державу погубив Амалика всегубителя. Тем Христу поим Богу нашему, яко прославися.

Возложи Моисей на столпе врачевство, тлетвориваго избавление, и ядовитаго угрызения: и древу образом Креста, по земли пресмыкающагося змия привяза, лукавный в сем обличив вред. Тем Христу поим Богу нашему, яко прославися.

Показа небо Креста победу благочестия держателю, и царю Богомудру, врагов в немже злосердных низложися сверепство, леть же превратися, и вера распростресе земным концем Божественная. Тем Христу поим Богу нашему, яко прославися.

Катавасия: Крест начертав Моисей, впрямо жезлом Чермное пресече, * Израилю пешеходящу, * тоже обратно фараоновым колесницам ударив совокупи, * вопреки написа непобедимое оружие. * Тем Христу поим Богу нашему, * яко прославися.

Песнь 3.

Ирмос: Жезл во образ тайны приемлется, * прозябением бо предразсуждает священника, * неплодящей же прежде Церкви, * ныне процвете древо Креста, * в державу и утверждение.

Яко испусти ударяемь воду краесекомый, непокоривым людем и жестосердым, Богозванн्या проявляше Церкви таинство, Еяже Крест держава и утверждение.

Ребром пречистым, копием прободенным, вода с кровию истече, обновляющая завет и омовательная греха, верных бо Крест похвала, и царей держава и Утверждение.

Катавасия: Жезл во образ тайны приемлется, * прозябением бо предразсуждает священника, * неплодящей же прежде Церкви, * ныне процвете древо Креста, * в державу и утверждение.

Седален, глас 4.

Подобен: Скоро предвари:

В тебе, треблаженне и жизнедавче Кресте, людие учреждающесе спразднуют, с невещественными Лики, чини архиерейстии благоговейно воспевают. Множество же монашествующих и постников покланяются, Христа же распенпагося вси славим.

Слава, и ныне, тойже.

Песнь 4.

Ирмос: Услышах Господи, * смотрения Твоего таинство, * разумех дела Твоя, * и прославих Твое Божество.

Горькородн्या преложи древом Моисей, источники в пустыни древле, Крестом ко благочестию языков проявляя преложение.

Глубине внедривый секущую издаде Иордан древу, Крестом и крещением, сечение лести знаменюя.

Священно ополчаются, четверочастнии людие предходяще образом свидетельства скинии, крестообразными чинми прославляемии.

Чудно простираемь, солнечныя лучы испущаше Крест, и поведаша небеса, славу Бога нашего.

Катавасия: Услышах Господи, * смотрения Твоего таинство, * разумех дела Твоя, * и прославих Твое Божество.

Песнь 5.

Ирмос: О Треблаженное древо, * на немже распяся Христос, Царь и Господь. * Имже паде древом прельстивый, * тобою прельстився, * Богу пригвоздившуся плотию, * подающему мир душам нашим.

Тебе приснопетое древо, на немже простресе Христос, Едем хранящее обращающееся оружие, Кресте устыдесе: страшный же херувим уступи, на тебе пригвожденному Христу, подающему мир душам нашим.

Подземных силы противныя Креста страшатся, начертаема знамения на воздухе, по немуже ходят небесных и земнородных роди, колена преклоняюще Христу, подающему мир душам нашим.

Зарями нетленными являся Божественный Крест, омраченным языком, заблужденным в прелести, Божественный свет облистав, усвоет на нем пригвожденному Христу, подающему мир душам нашим.

Катавасия: О Треблаженное древо, * на немже распяся Христос, Царь и Господь. * Имже паде древом прельстивый, * тобою прельстився, * Богу пригвоздившуся плотию, * подающему мир душам нашим.

Песнь 6.

Ирмос: Воднаго зверя во утробе, * длани Иона крестовидно распростер, спасительную страсть проображаше яве. * Тем тридневен изшед, премірное воскресение прописаше, * плотию пригвожденного Христа Бога, * и тридневным воскресением мiр просвещшаго.

Старостию преклонився, и недугом отягчен исправися, Иаков руже пременив, действие являя жизноноснаго Креста: ибо ветхость законнаго сеновнаго писания новописа, на сем плотию пригвоздивыйся Бог, и душегубительный недуг лести отгна.

На юныя возложив длани Божественный Израиль, крестовидно главы являше, яко старейшая слава, законослужители людие. Темже подмневся тако испрельститися, не измени жизноноснаго образа: превзыдут бо людие Христовы Божии новоутверждении, вопияху, Крестом ограждаеи.

Катавасия: Воднаго зверя во утробе, * длани Иона крестовидно распростер, спасительную страсть проображаше яве. * Тем тридневен изшед, премірное воскресение прописаше, * плотию пригвожденного Христа Бога, * и тридневным воскресением мiр просвещшаго.

Кондак, глас 4.

Вознесыйся на Крест волею, * тезоименитому Твоему новому жительству, щедроты Твоя даруй, Христе Боже, * возвесели силою Твоею верныя люди Твоя, * победы дая нам на сопостаты, * пособие имущим Твое, оружие мира, непобедимую победу.

Икос: Иже до третияго небесе восхищен бысть в рай, и глаголы слышав неизреченныя и Божественныя, ихже не леть языки [человеческими] глаголати. Что галатом пишет, яко рачителие писаний прочтосте и познасте: мне, глаголет, хвалитися да не будет, токмо во едином Кресте Господни, на немже страдав уби страсти. Того убо и мы известно держим, Крест Господень, хвалу вси: есть бо нам спасительное сие древо, оружие мира, непобедимая победа.

Песнь 7.

Ирмос: Безумное веление мучителя * злочестиваго люди поколеба, * дышущее презрение и злохуление богомерзкое: * обаче три отроки не устраши ярость зверская, * ни огонь снедаяй, но противодышущу росоносному Духу, * со огнем суще пояху: * препетый отцев и нас Боже, благословен еси.

От древа вкусив первый в человецех, в тление вселися: отвержением бо жизни безчестнейшим осудився, всему роду телотленен некий, яко вред недуга преподаде: но обретше земнороднии воззвание Крестным древом, зовем: препетый отцев, и нас Боже, благословен еси.

Разруши повеление Божие преслушание, и древо принесе смерть человеком, еже неблаговременно причастно бывшее: во утверждение же зело честнаго. Оттуду жизни древо возбраняемо бе, еже разбойнику злоумершу отверзе, благо разумно зовущу: препетый отцев, и нас Боже, благословен еси.

Жезла объемлет край Иосифова, будущая зря Израиль, царствия державное, яко возымушествит преславный Крест, проявляя: сей бо победоносная похвала, и свет верою зовущим: препетый отцев, и нас Боже благословен еси.

Катавасия: Безумное веление мучителя * злочестиваго люди поколеба, * дышущее презрение и злохуление богомерзкое: * обаче три отроки не устраши ярость зверская, * ни огонь снедаяй, но противодышущу росоносному Духу, * со огнем суще пояху: * препетый отцев и нас Боже, благословен еси.

Песнь 8.

Ирмос: Благословите отроцы, * Троицы равночисленнии, * Содетеля Отца Бога, пойте снизшедшее Слово, * и огонь в росу претворшее, * и превозносите всем жизнь Подавающаго, * Духа Всесвятаго, во веки.

Воздвигаему Древу, окроплену Кровию воплощагося Слова Бога, пойте небесныя силы: земных воззвание, празднующе людие, поклонитесь Христову Кресту, имже миру востание во веки.

Земнороднии дланми, строителие благодати Крест, на немже стояше Христос Бог, возносите священнолепно и копие, Божия Слова Тело прободшее, да видят языцы вси спасение Божие, славяще Его во веки.

Божественным судом предызбраннии веселитесь, христианстии вернии людие хвалитесь победоносным оружием, приемше от Бога Крест Честный: в сем бо колена браней дерзости ищуще, разсыпаются во веки.

Катавасия: Благословите отроцы, * Троицы равночисленнии, * Содетеля Отца Бога, пойте снизшедшее Слово, * и огонь в росу претворшее, * и превозносите всем жизнь Подавающаго, * Духа Всесвятаго, во веки.

На 9-й песни

Честнейшую: не поем, но поем пришев праздника:

Величай, душе моя, Пречестный Крест Господень.

Таже, ирмос 1-го канона: Таин еси, Богородице, рай, * невозделанно возрастивший Христа, * имже Крестное живоносное на земли насадися древо. * Тем ныне возносиму, покланяющеся ему, * Тя величаем.

Величай, душе моя, Пречестный Крест Господень.

Да возрадуются древа дубравная вся, освятившуся естеству их, от негоже изначала насадишася, Христу распростершуся на древе. Тем ныне возносиму, покланяющеся Ему, Тя величаем.

Величай, душе моя, Пречестный Крест Господень.

Священный воста рог, и глава всем Богомудрым Крест, имже грешных мысленно стираются роги вси. Тем ныне возносиму, покланяющеся ему, Тя величаем.

Другой припев:

Величай, душе моя, Животворящаго Креста Господня воздвижение.

И ирмос: Снедию древа роду прибывшая смерть, Крестом упразднися днесь: ибо праматерняя всеродная клятва разрушися, прозябением Чистыя Богоматере, Юже вся силы небесныя величают. И другой лик подобне, припев, и ирмос: тропари же 6 с симже припевом.

Величай, душе моя, Животворящаго Креста Господня воздвижение.

Горести убийственныя, яже от древа, не оставив Господи: Крестом бо сию совершенно истребил еси. Сего ради и древом услади иногда гореть вод Мерры, прообразующее Креста действо, еже вся силы небесныя величают.

Величай, душе моя, Животворящаго Креста Господня воздвижение.

Непрестанно гружаемая мраком праотца, Господи, Крестом возвысил еси днесь, яко бо лестию весьма неудержанно естество преднизведесе: всеродне ны паки исправи свет Креста Твоего, егоже вернии величаем.

Величай, душе моя, Животворящаго Креста Господня воздвижение.

Да образ покажеш миру покланяемый, Господи, Креста, во всех яко преславный на Небесех изобразил еси, светом безмерным озарен: царю всеоружие непобедимое. тем ты вся силы Небесныя величают.

Катавасия: Таин еси, Богородице, рай, * невозделанно возрастивший Христа, * имже Крестное живоносное на земли насадися древо. * Тем ныне возносиму, покланяющесе ему, * Тя величаем.

Светилен.

Подобен: Учеником:

Крест, хранитель всея вселенныя, Крест, красота Церкви: Крест, царей держава, Крест, верных утверждение, Крест, ангелов слава и демонов язва.

Слава, и ныне.

Подобен: Жены, услышите:

Крест воздвизается днесь, и мир освещается: иже бо со Отцем седяй, и Духом Святым, на сем руце распростре: мир весь привлече к Твоему, Христе познанию. Иже убо на Тя надеющыяся, Божественныя сподоби славы.

На хвалитех стихиры, на 4, глас 8.

Самоподобен:

О преславнаго чудесе, живоносный сад, Крест Пресвятый на высоту возносимъ является днесь. Славословят вси концы земнии, устрашаются демонския полки. О каковый дар земным даровася, имже Христе спаси души наша яко Един благоутробен. [Дважды.]

О преславнаго чудесе, яко грозд исполнен живота, понесый Вышняго, от земли воздвизаемъ Крест видится днесь, имже вси к Богу привлекохомся, и пожерта бысть до конца смерть. О древо Пречестное, имже восприяхом во Едеме безсмертную пищу, Христа славяще!

О преславнаго чудесе, широта Креста и долгота небеси равна есть: яко Божественною благодатию освящает всяческая. О сем языцы варварстии побеждаются. О сем вера утверждается. О Божественныя лествицы, еюже восходим на Небеса, возносяще в песнях Христа Господа!

Слава, и ныне, глас 6:

Днесь происходит Крест Господень, и вернии приемлют того желанием, и берут исцеления души же и тела, и всякия болезни. Сего целуим радостию и страхом: страхом, греха ради, яко недостойны суще: радостию же, спасения ради, еже подают миру на том пригвоздивыйся Христос Бог, Имеяй велию милость.

И славословие великое тихо и согласно поют. А о крестном воздвижении, и о поклонении, якоже устав повелевает.

Вместо Трисвятаго:

Кресту Твоему покланяемся, Владыко, и святое Воскресение Твое славим.
[Трижды]

Слава, и ныне,

И святое Воскресение Твое славим.

Кресту Твоему покланяемся, Владыко, и святое Воскресение Твое славим.

Егда же целуем Честный Крест: Поем стихиры самогласны Честнаго Креста,

Глас 2:

Приидите вернии, Животворящему древу поклонимся: на немже Христос Царь славы волею руке распростер, вознесе нас на первое блаженство, яже прежде враг сластию украд, изгнаны от Бога сотвори. Приидите вернии, древу поклонимся, имже сподобихомся невидимых враг сокрушити главы. Приидите вся отечествия языков Крест Господень песньми почтим. Радуйся Кресте, падшаго Адама совершенное избавление: Тя ныне со страхом христиане целующе, на тебе пригвоздившагося Бога славим глаголюще: Господи, на том пригвоздивыйся, помилуй нас, яко Благ и Человеколюбец.

Глас 5:

Приидите людие, преславное чудо видяще, Креста силе поклонимся: яко древо в раи смерть прозябе, сие же жизнь процвете, безгрешнаго имуща пригвожденна Господа. От Негоже вси языцы нетление вземлюще зовем: Иже крестом смерть упразднилый, и нас свободивый, слава Тебе.

Глас тойже:

Глас пророк Твоих, Исаии и Давида, исполнися Боже, глаголющий: приидут вси языцы Господи, и поклонятся пред Тобою: се бо людие, иже Твоя, Блаже благодати наполнишася, во дворех Твоих Иерусалима. Крест претерпевый за ны, и воскресением Твоим животворяй, сохрани и спаси ны.

Глас 6:

Четвероконачный мир днесь освящается, четверочастному воздвигаему Твоему Кресту, Христе Боже наш, и рог верных христиан совозносится. Тем врагов сокрушаем роги, велий еси Господи, и дивен в делех Твоих, слава Тебе.

Пророков гласи, древо святое предвозвестиша, имже древния свободися клятвы смертныя Адам, тварь же, днесь возносиму Тому, совозвышает глас, от Бога просящи богатия милости: но Единый в благоутробии, безмерный Владыко, очищение буди нам, и спаси души наша.

Глас 8:

Глас пророка Твоего Моисеа, Боже, исполнися глаголай: узрите живот ваш висящ пред очесы вашими. Днесь Крест воздвизается, и мир от лести освобождается, днесь Христово Воскресение обновляется, и концы земли радуются, в кимвалех Давидски песнь Тебе приносяще и глаголюще: соделал еси спасение посреде земли, Боже, Крест и Воскресение: ихже ради нас спасл еси, Блаже и Человеколюбче, Всесильне Господи, слава Тебе.

Глас тойже:

Днесь Владыка твари, и Господь славы, на Кресте пригвождается, и в ребра прободается, желчи и отца вкушает, Сладость церковная: венцем от терния облагается, покрываяй небо облаки, одеждою облачится поругания: и заушается брэнною рукою, рукою создавый человека, по плещема биен бывает, одеваяй небо облаки, заплевания и раны приемлет, поношения и заушения, и вся терпит мене ради осужденнаго: Избавитель мой и Бог, да спасет мир от прелести, яко благоутробен.

Слава, и ныне, глас тойже:

Днесь Неприкосновенный существом, прикосновенен мне бывает, и страждет страсти, освобождаяй мя от страстей, свет подаваяй слепым, от беззаконных устен оплевается, и дает плещи за плененных на раны. Сего Чистая Дева и Мати на Кресте зрящи, болезненно вещаше: увы мне, Чадо Мое, что сие сотворил еси? красный добротою паче всех человек, бездыханный беззрачный являешися, не имея вида, ниже доброты: увы Мне, Мой Свете, не могу спяща зрети Тя, утробою уязвляюся, и лютое оружие сердце Мое проходит: воспеваю Твоя страсти, покланяюся благоутробию Твоему, Долготерпеливе Господи, слава Тебе.

Таже ектении и прочее обычное. И бывает совершенный отпуст.

НА ЛИТУРГИИ

Антифонъ 1й

Стих 1: Боже, Боже мой, вонми ми,* вскую оставил мя еси.

Припев: Молитвами Богородицы, Спасе, спаси нас.

Стих 2: Далече от спасения моего* словеса грехопадений моих.

Припев: Молитвами Богородицы, Спасе, спаси нас.

Стих 3: Боже мой, воззову во дни, и не услышиши,* и в ноци и не в безумие мне.

Припев: Молитвами Богородицы, Спасе, спаси нас.

Стих 4: Ты же во святем живещи,* хвало Израилева.

Припев: Молитвами Богородицы, Спасе, спаси нас.

Слава, и ныне:

Припев: Молитвами Богородицы, Спасе, спаси нас.

Антифонъ 2й

Стих 1: Вскую, Боже,* отринул ны еси до конца?

Припев: Спаси ны, Сыне Божий, плотию распныйся, поюция Ти: Аллилуиа.

Стих 2: Помяни сонм Твой,* его же стяжал еси исперва.

Припев: Спаси ны, Сыне Божий, плотию распныйся, поюция Ти: Аллилуиа.

Стих 3: Гора Сион сия,* в ней же вселился еси.

Припев: Спаси ны, Сыне Божий, плотию распныйся, поюция Ти: Аллилуиа.

Стих 4: Бог же Царь наш прежде века,* содела спасение посреде земли.

Припев: Спаси ны, Сыне Божий, плотию распныйся, поюция Ти: Аллилуиа.

Слава, и ныне:

Единородный Сыне, и Слове Божий, Безсмертен Сый. * И изволивый спасения нашего ради * воплотитися от Святыя Богородицы и Приснодевы Марии, * непреложно Вочеловечивыйся. * Распныйся же, Христе Боже, смертию смерть поправый. * Един Сый Святыя Троицы, * Спрославляемый Отцу и Святому Духу, спаси нас.

Антифонъ 3й

Стих 1: Господь воцарися,* да гневаются людие.

Тропарь, глас 1:

Спаси Господи люди Твоя, * и благослови достояние Твое, * победы православным христианом * на сопротивныя даруя, * и Твое сохраняя * Крестом Твоим жительство.

Стих 2: Господь воцарися, да гневаются людие,* седяй на Херувимех, да подвижится земля.

Тропарь: Спаси, Господи, люди Твоя...

Стих 3: Господь в Сионе велик* и высок есть над всеми людьми.

Тропарь: Спаси, Господи, люди Твоя...

Стих 4: Поклонитесь Господеви* во дворе святем Его.

Тропарь: Спаси, Господи, люди Твоя...

По входе же Евангелиа, священник входный стих:

Вознесите Господа Бога нашего, и поклоняйтесь подножию ногу Его, яко свято есть.

Тропарь, глас 1:

Спаси Господи люди Твоя, * и благослови достояние Твое, * победы православным христианом * на сопротивных даруя, * и Твое сохраняя * Крестом Твоим жительство.

Слава, и ныне: Кондак, глас 4.

Вознесыйся на Крест волею, * тезоименитому Твоему новому жительству, щедроты Твоя даруй, Христе Боже, * возвесели силою Твоею верных люди Твоя, * победы дая нам на сопостаты, * пособие имущим Твое, оружие мира, непобедимую победу.

Вместо Трисвятаго:

Кресту Твоему поклоняемся, Владыко, и святое Воскресение Твое славим.
[Трижды]

Слава, и ныне,

И святое Воскресение Твое славим.

Кресту Твоему поклоняемся, Владыко, и святое Воскресение Твое славим.

Прокимен, глас 7:

Прокимен: Вознесите Господа Бога нашего, и поклоняйтесь подножию ногу Его, яко свято есть.

Стих: Господь воцарися, да гневаются людие.

Апостол к коринфяном, зачало 125.

Братие, слово крестное погибающим убо юродство есть, а спасаемым нам сила Божия есть. Писано бо есть: погублю премудрость премудрых, и разум разумных отвергу. Где премудр? Где книжник? Где совопросник века сего? Не обуи ли Бог премудрость мира сего? Понеже бо в премудрости Божией не разуме мир премудростию Бога, благоизволил Бог буйством проповеди спасти верующих. Понеже и иудее знамения просят, и еллини премудрости ищут: Мы же проповедуем Христа распята, иудеем убо соблазн, еллином же безумие. Самем же званым, иудеем же и еллином, Христа, Божию силу и Божию премудрость.

Аллилуиа, глас 1: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие от Иоанна, зачало 60.

Во время оно, совет сотвориша архиереи и старцы на Иисуса, яко да убьют Его. И приведоша Его к Пилату, глаголюще: возми, возми, распни Его. Глагола им Пилат: поимите Его вы и распните. Аз бо не обретаю в Нем вины. Отвещаша ему

иудее: мы закон имамы, и по закону нашему должен есть умереть, яко Себе Сына Божия сотвори. Егда же слыша Пилат сие слово, паче убояся. И вниде в претор паки, и глагола Иисусови: откуда еси Ты? Иисус же ответа не даде ему. Глагола же Ему Пилат: мне ли не глаголеши? Не веси ли, яко власть имам распяты Тя, и власть имам пустити Тя? Отвеща Иисус: не имаша власти ни единыя на Мне, аще не бы ти дано свыше. Пилат же слышав сие слово, изведе вон Иисуса, и седе на судищи, на месте глаголемем Лифостротон, еврейски же Гаввафа. Бе же пяток Пасце, час же яко шестый. И глагола Иудеом: се Царь ваш. Они же вопияху: возми, возми, распни Его. Глагола им Пилат: Царя ли вашего распну? Отвещаша архиереи: не имамы царя, токмо кесаря. Тогда же предаде Его им, да распнется. Поемше же Иисуса, и ведоша. И нося крест Свой, изыде в глаголемое Лобное место, еже глаголется еврейски Голгофа. Идеже пропяша Его и с Ним ина два, сюду и сюду, посреде же Иисуса. Написа же и титла Пилат, и положи на кресте. Бе же написано: Иисус Назорянин, Царь Иудейский. Сего же титла мнози чтоша от Иудей, яко близ бе место града, идеже пропяша Иисуса. И бе написано: еврейски, гречески, римски. Стояху же при кресте Иисусове Мати Его и сестра Матере Его, Мария Клеопова, и Мария Магдалина. Иисус же виде Матерь, и ученика стояща, егоже любляще, глагола Матери Своей: Жено, се сын Твой. Потом же глагола ученику: се Мати твоя. И от того часа поят Ю ученик во своя си. Посем ведый Иисус, яко вся уже совершишася, и приклонь главу, предаде дух. Иудее же, понеже пяток бе, да не останут на кресте телеса в субботу, бе бо велик день тоя субботы, молиша Пилата, да пребиют голени их, и возмут. Придоша же воины, и первому убо пребиша голени, и другому распятому с Ним. На Иисуса же пришедше, яко видеша Его уже умерша, не пребиша Ему голений. Но един от воин копием ребра Ему прободе, и абие изыде кровь и вода. И видевый свидетелствова, и истинно есть свидетельство его.

За Достойно, ирмос:

Величай, душе моя, Пречестный Крест Господень.

Ирмос: Таин еси, Богородице, рай, * неводеланно возрадивший Христа, * имже Крестное живоносное на земли насадися древо. * Тем ныне возносиму, поклоняющеся ему, * Тя величаем.

Причастен: Знаменася на нас свет лица Твоего, Господи.

На трапезе же бывает утешение братии, от елеа и вина и прочих снедей овощных: сыра же и яиц и рыбы никакоже дерзнем коснуться.